

Kastam tidak akan berkompromi

Kuala Lumpur: Jabatan Kastam Diraja Malaysia (JKDM) tidak akan berkompromi atau melindungi mana-mana pihak yang terbabit dalam aktiviti penyeludupan dan penyelewengan cukai hingga menyebabkan ketirisan hasil negara.

Ketua Pengarahnya Datuk Anis Rizana Mohd Zainudin berkata, pendirian JKDM adalah jelas, tegas dan konsisten iaitu tidak akan berkompromi atau melindungi pihak yang penyeludupan serta penyelewengan cukai.

Menurutnya, pihaknya turut terbabit dalam operasi bersepadu dikenali sebagai Ops Metal yang dilaksanakan di lima negeri melalui kerjasama strategik diketuai Suruhanjaya Pencegah Rasuah Malaysia (SPRM) bersama Lembaga Hasil Dalam Negeri (LHDN) dan Bank Negara Malaysia (BNM) bermula 14 Julai lalu.

“Operasi ini dilaksanakan sebagai sebahagian daripada usaha berterusan JKDM untuk membanteras aktiviti penyeludupan, penyelewengan dan mencegah ketirisan hasil negara.

“Penglibatan JKDM dalam operasi inter-agensi terbabit mencerminkan komitmen jabatan dalam memperkukuh tadbir urus serta memastikan ketelusan dan integriti dalam industri yang berisiko tinggi terhadap aktiviti tidak sah,” katanya.

Katanya, pihaknya berharap kerjasama strategik

dengan agensi-agensi penguatkuasaan diteruskan dan JKDM sentiasa bersedia memberikan komitmen penuh bagi memastikan kutipan hasil negara terpelihara demi kesejahteraan dan keselamatan negara.

Mengulas mengenai modus operandi mengeksport barang buangan terjadual seperti e-waste atau skrap, sindiket akan membuat pengikraran secara tidak betul atau tidak benar.

“Malah, JKDM sentiasa bekerjasama dengan Jabatan Alam Sekitar (JAS) dan Institut Piawai dan Penyelidikan Perindustrian Malaysia (SIRIM).

“Sebagai makluman, JKDM mengadakan operasi khas e-waste di Pelabuhan Klang, Selangor bermula Ogos hingga Disember 2024.

“Daripada 336 kontena yang disyaki e-waste yang diperiksa secara bersama oleh JKDM dan JAS, sebanyak 306 kontena disahkan barangan e-waste dan diserahkan kepada JAS,” katanya.

Katanya, JKDM juga mengambil langkah proaktif penguatkuasaan secara berterusan bagi mengesahkan aktiviti penyeludupan di pintu-pintu utama pelabuhan negara.

“Bagi kes-kes yang melibatkan skrap, JKDM akan menjalankan siasatan ke atas mana-mana orang yang melakukan kesalahan dan boleh diambil tindakan mahkamah,” katanya.

“JKDM tidak akan melindungi pihak penyeludupan serta penyelewengan cukai”
Anis Rizana